

**ANG**

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 10
Mayo 21, 2006
www.philippinerevolution.org

Editorial

Maduguon nga pagpang-intriga, maduguon nga pagpangtapna

Malisyoso kag mapaniplang ang mandu ni Gloria Arroyo sa pulisya nga imbestigahan kuno ang sunud-sunod nga pagpangkuot kag pagpatay sa mga maki-masa nga personahe, lider kag myembro sang mga progresibong partido kag organisasyon.

Amo gani nga pakuno-kuno lamang ang amo nga imbestigasyon. Naobligar si Arroyo nga maghimo sang pakitang-tawo nga tikang sa atubang sang malaparan nga pagkunderar sa militar kag sa iya rehimen nga sila ang tunay nga utok sa likod sang wala untat nga kalakasan batuk sa pumuluyo kag ila mga progresibong pwersa.

Katuwang sang tikang nga "imbestigasyon", nagapalapta ang Malakanyang sang isa ka daku nga kabutigan: nga ang mga biktima sang kalakasan sang rehimeng Arroyo, amo mga biktima kuno sang "pagpurga" sa kubay sang PKP kag BHB, kag sila mga ginasuspetsahan kuno nga mga ahente sang guberno. Kasunod sini, ginasiling nila nga si Arroyo kag "duha ka nagapamuno nga upisyal sang Malakanyang nga

ginahingalanan Gonzales" ang target nga patyon sang BHB. Wala pa nakuntento sa mga kabutigan nga ini, gindugang pa nila nga igasunod man sa mga pagapatyon ang pila ka lider sang pangpulitika nga oposisyon.

Nagkadto na sa pagtahi-tahi sang pantasya ang Malakanyang sa desperasyon sini nga takpan ang kamatuoran kag manghugas-kamot sa responsibilidad sini sa pagpatay sa ginatus-gatos nga progresibong aktibista. Malisyoso nga ginapasibangud ini sa PKP kag BHB sa katuyuan nga magsabwag sang intriga kag samaron ang rebolusyonaryong kahublagan. Ginatinguha sini nga tungaan ang kubay sang nagahiliugyong prente nga anti-Arroyo kag

pahinaon ang kahublagan masa nga nagasulong sang pagpukan sang rehimeng Arroyo. Gusto man sini nga pahugon kag ikundisyon ang pumuluyo para sa mas masingki pa nga pagpamigos.

Kabahin sang maduguon nga pagpang-intriga sang rehimeng Arroyo ang pilit nga pagdalahig sa anum nga tiglawas sang mga progresibong partido sa Kongreso sa mga kaso sang pagpatay kag pagkuot.



Mga tampok sa isyu nga ini...

10 armas, naagaw sa Leyte kag Samar
PAHINA 7

Interbyu kay Jorge "Ka Oris" Madlos
PAHINA 8

Daniel Boone Schirmer, 91
PAHINA 11

Sariwaol man ang lohika kag kulang sa basehan, pilit nga ginapagguwa nga ang mga biktima nga organisasyon ang yara sa likod sang pagpatay sa kaugalingon sini nga mga lider.

Luwas sa pagdalahig sa subong nga mga pagpamatay, plano man ni Justice Sec. Raul Gonzales nga dalahigon ang anum nga progresibong mamalidha sa pagpatay sa mga ginadudahan nga impilador sa rebolusyonaryong hublag sadtong dekada 1980. Sa sini dugangan sang bugang-isip nga ebidensya ang himu-himo nga kasong rebelyon batuk sa ila nga pilit nagadalahig sa ila sa PKP kag BHB kag sa pagpakighimbon kuno sini sa mga rebeldeng militar agud maglunsar sang kudeta.

Kadungan sang maduguon nga pagpang-intriga, ginapasingki pa ang sang ipokrito kag nagapakalimpyo nga rehimen ang maduguon nga pagpanghingabot sa mga progresibong pwersa. Sa subong 585 na nga mga lider kag myembro sang progresibong partido kag organisasyon ang nangin biktima sang *death squad* halin nga magpungko si Arroyo sa poder sadtong 2001. Nagsugod man ang operasyon sang mga *death squad* sa Metro

Manila kag isa ka myembro sang Bayan Muna sa Makati ang una nga biktima.

Nakalapta ang mga *death squad* ni Arroyo sa nagkalain-lain nga yunit sang AFP kag yara sa kumand sila sang mga kriminal nga pasistang upisyal nga pinakatampad man kay Arroyo—pareho ni Maj. Gen. Jovito Palparan. Kilala ini sa sulod sang AFP bilang “black army”. Sa Malakanyang, ang direkta nga nagadiriher sa tanan nga ini wala liwan kundi si Norberto Gonzales kag ang ginapamunuan niya nga Cabinet Oversight Committee on Internal Security (COC-IS).

Ginalauman sang rehimen nga paagi sa mga ini mapaluya kon indi man mawasak ang mga pwersa nga pinakamasupog nga nagabato kay Arroyo. Ang mismo puno nga berdugo sang rehimen nga si General Palparan ang naghambal ang mga napatay nga di armadong aktibisa “*collateral damage*” ukon mga di malikawan nga kaswalti katuwang sang mas daku kag madugayan nga katuyuan nga waskon ang rebolusyonaryong hublag.

Pero nagsala ang rehimen sa paglaum nga paagi sang mga pasista nga atake nga ini mawasak ang re-

bolusyonaryong hublag kag makibot kag mapahina ang hayag kag ligal nga kahublagang anti-Arroyo. Ang wala hawid nga pagpamatay sa mga progresibong pwersa kag ang anti-komunista nga pagpanamad desperado nga tikang sang isa ka rehimen nga labing nahamulag bangud sa nagapadayon nga pagkabuyagyag sang mga pasistang krimen sini, sang mga patung-patong nga mga kaso sang korapsyon kag pagdinaya sa eleksyon kag madamu pa nga ibang krimen sa pumuluyo kag sa pungsod.

Baliskad sa ginalauman sini, labi nga nabuyagyag ang pinakamapiguison kag brutalidad sang rehimen kag labi nga nagasingki kag nagalapad ang kaakig sang pumuluyo. Padayon nga nagabato ang mga lider, organisasyon kag pwersa nga ginatinguha kugmaton sang rehimen. Nagadamu ang gusto mag-armas batuk sa gubyernong Arroyo kag labi nga nagadaku kag nagabaskog ang armado nga rebolusyonaryong kahublagan. Ginapakita lamang sang mga pagpatay kag pasistang kalakasan sang rehimen Arroyo ang kahustuhan kag pagkakinahanglanon nga batuan kag waskon na ang ginakangil-aran nga rehimen nga ini.

Labi pa nga nagaluya ang rehimen sa atubang sang pagsingki sang mga taktikal nga opensiba sang BHB, paglapad sang kahublagan kag nagahiliugyong prente nga anti-Arroyo, mga paghulag sa kalye kag iban pa nga pangpulitika nga aksyon sang mga pwersang anti-Arroyo. Pati sa kubay sang armadong kusog nga nagaserbi nga pangunahon sandigan sang rehimen, nagalapad ang pagkadigusto kag nagadamo ang mga nakahanda magbiya sang suporta sa rehimen kag direkta nga nagabato para mabayluhan na ini.

Indi magdugay, ang bug-at sang mga kasal-anan sang rehimen Arroyo kag ang mabaskog nga handum sang pumuluyo nga angkunon ang hustisya amo ang magapapukan diri. **AB**



Tuig XXXVII No. 10 Mayo 21, 2006

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Madinuguon nga pagpang-iintriga, madinuguon nga pagpangtapna	1
Padayon nga pagpamatay kag pagkuot	3
Pagpang-ipit sa Batasan 6	4
Nagadamo nga sablag sa Cha-cha	5
Arroyo, may sala—CCTA	6
Arroyo, ginkundenar sg CBCP	6

Madinalag-on nga TO

2 M16 naagaw sa Negros	7
10 armas, naagaw sa Leyte at Samar	
Ambus sa Isabela	

Interbyu kay Ka Oris	8
Pagbato sa NEMR	9
Daniel Schirmer, 91	11
Pang-eespiya sg US sa Pilipinas	12

Balita	14
---------------	-----------

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Nagapadayon nga pagpamatay kag pagkuot

Padayon nga nagalaba ang listahan sang mga makangingidlis nga krimen sang rehimeng Arroyo batuk sa pumuluyo. Sa sulod lamang sang napulo ka adlaw, apat ang ginpatay, isang ang gintuyo patyon kag duha ang ginkuot nga mga myembro kag lider sang mga progresibong organisasyon. Biktima man sang pagpamatay ang iban pa nga grupong anti-Arroyo.


Ginlambatan sang mga nakamoto-siklo nga lalaki ang mag-utod nga Jose Doton, 62 kag Diosdado Doton, 57, sa Camangaan, San Nicolas, Pangasinan sadtong Mayo 16. Gilayon nga namatay si Jose samtang yara sa kritikal nga kundisyon subong si Diosdado. Si Jose ang nagaakto nga *secretary general* sang Bagong Alyansang Makabayan (BAYAN)-Pangasinan kag presidente sang Tignay dagiti Mannalon a Mangwayawaya ti Agno (TIMMAWA) nga aktibo sa pagbato sa San Roque Dam kag hayagan nanawagan para sa pagpatalsik kay Gloria Arroyo. Suno kay Roman Polintan, *secretary general* sang BAYAN-Central Luzon, si Doton ang ika-27 katapu sang BAYAN nga pinatay sa rehiyon subong nga tuig.

Sa Metro Manila, ginkuot sang mga armadong lalaki sining Mayo 16 si Roland Ralla Porter sang Bayan Muna sa atubang sang isa ka tindahan sa Makati City. Suno sa mga nakasaksi, pwersahan siya nga ginsakay sa isa ka van sang mga nagpakilala nga pulis. Tubtub subong wala pa siya ginapatuhaw. Si Porter ang ika-15 aktibista nga ginkuot sa tuig nga ini kag ika-148 halin sang magpungko si Arroyo sa poder sadtong 2001.

Tatlo ka adlaw antes ini, ginluthang tubtub mamatay si Manuel Nardo, Bayan Muna (BM) *coordinator* sa Barangay Quebiawan, City of San Fernando, Pampanga. Nagahapaon na kag tatlong beses pa nga ginpalukpan si Nardo sa tiyan. Nagpalagyo ang mga kriminal sakay sa

isa ka motorsiklo.

Ginpangluthang man tubtub mamatay ang mag-asawa nga Elena "Baby" Mendiola, 54, kag Ricardo Balauag, 61 sa Barangay Garit Sur, Echague, Isabela sadtong Mayo 10. Si Mendiola ang *secretary general* sang BM sa Isabela samtang aktibo nga katapu sang BM ang iya bana. Indi ini ang una nga hitabo nga ginlambatan si Mendiola sang mga *death squad* ni Arroyo. Una nga gintuyo ang iya kabuhi sadtong Marso 11.



Ginlambatan man sa Oroquieta City, Misamis Occidental ang mag-asawa nga pastor nga sanday Rev. Jeremias Tinambacan kag Rev. Marilou Tinambacan sadtong Mayo 9. Gilayon nga napatay si Jeremias samtang yara sa kritikal nga kondisyon ang iya asawa. Si Jeremias tagapangulo sang Bayan Muna-Misamis Occidental kag sila nga magtiayon mga pastor sang United Church of Christ in the Philippines. Suno kay Marilou, isa sa mga nagambus sa ila si Mamay Guimalan, isa ka ahente sang AFP *intelligence*.

Halin sang magpungko si Arroyo sadtong 2001, nagalab-ot na sa 585 ang ginpatay nga mga lider kag katapu sang mga progresibong organisasyon. Saysenta'y syete sa ila ang ginpatay halin Enero 2006.

Suno man sa imbestigasyon nga

ginhimo sang International Labor Solidarity Movement (ILSM) sining Mayo 2-6, "sistematiko kag lapnagon" ang mga paglapas sa tawhanong kinamatarung kag kinamatarung sang mamumugon sa idalum sang rehimeng Arroyo. Lakip sa mga ginakundenar sang ILSM ang pagmasaker sa Hacienda Luisita, ang mga pagpatay sa mga aktibistang obrero kag mangunguma kag mga kaso sang pagkuot kag harassment.

Gintumod sang ILSM nga utok sang mga paglapas sa tawhanong kinamatarung si Gloria Arroyo kag mga tinawo sini. Nalista ang 874 kaso sang paglapas sa tawhanong kinamatarung nga nagabiktima sang 99,011 indibidwal, 14,302 pamilya kag 288 komunidad sadtong 2005. Samtang, nagadamu man ang mga nareport nga pagpamatay sa mga lider kag myembro sang iban pa nga mga organisasyong anti-Arroyo.

Ginpangluthang sining Mayo 18 sa Balanga, Bataan si Anna Gandia, organisador sang kababaihan. Antes ini, ginpatay man sa Bataan ang maslider nga si Irma "Cathy" Alcantara kag lider sang kabataan nga si Audie Lucero.

Sa Davao del Norte, ginpatay ang lider mangunguma nga si Eric Cabanit sa Panabo City sadtong Abril 24.

Sa Negros, apat na nga lider mangunguma ang ginpamatay halin Marso tubtub Mayo. Ginluthang sining Mayo 17 sa La Castellana, Negros Occidental si Mario Domingo. Ginpatay naman sadtong Abril 22 sa Kabankalan, Negros Occidental si Porfirio Maglasang. Antes ini, ginpatay si Rico Adeva sa Silay City, Negros Occidental sadtong Abril 15. Ginpangluthang naman sadtong Marso 27 sa Tanjay City, Negros Oriental si Vicente Denila.

AB

Padayon nga pagpang-ipit sa "Batasan 6"

Nagguwa na sa bilding kag proteksyon sang House of the Representatives sadtong Mayo 8 ang lima nga kongresista nga ginatawag "Batasan 5" (Cong. Satur Ocampo, Joel Virador kag Teddy Casino sang Bayan Muna, Rafael Mariano sang Anakpawis kag Liza Maza sang Gabriela Women's Party) makaligad ang lampas duha ka bulan nga pagkahunong didto agud malikawan ang pamahug sang rehimeng Arroyo sang pag-aresto nga wala mandamyento.

Napilitan si Justice Secretary Raul Gonzales nga bawion ang pamahug matapos ibasura sang Makati Regional Trial Court ang tikang sang Department of Justice (DOJ) nga ilakip sila sa masobra 40 iban pa sa kasong rebelyon nga nauna nga ginpasaka batuk sa naaresto nga sanday Anakpawis Cong. Crispin "Ka Bel" Beltran kag 1st Lt. Lawrence San Juan.

Ginsug-alaw ang "Batasan 5" sang masobra isa ka libo nga tagasuporta kag abyan sa guwa sang Batasan kag halin diri nagpadulong sila sa University of the Philippines sa Diliman agud padayunon lunsay ang selebrasyon sang ila kadalagan kag ang ila liwat nga pagpasakup sa mga protesta sa kalaye kag iban pa nga paghulag batuk sa rehimen.

Kit-anon sang tanan nga wala untat ang pagpursiger sang rehimen nga kasuhan, arestuhon kag ipiton ang lima nga progresibong mamalidha. Pila ka adlaw pa lang matapos makagguwa sila sa Batasan Complex, liwat ginpasaka sang DOJ ang kaso batuk sa ila kag kay Lieutenant San Juan sa Makati Regional Trial Court sa idalum sang iban nga huwes.

Maathag nga wala pa gihapon sang mabakud nga basehan ang liwat nga ginpasaka nga kaso nga base lamang sa ginlubid mga estorya nga ginlakipan sang mga bag-o nga himu-himo nga ebidensya. Pilit nga ginapagguwa sang DOJ nga may direkta nga kaangtanan ang lima

nga mamalidha sa armadong kahublagan kag pati sa kuno paglunsar sang kudeta batuk sa rehimen. Kadungan sini, nagapadayon man ang mga pagpanamad kag pagpadihut batuk sa ila sang mga puno nga pasista sang Malakanyang nga sanday National Security Adviser Norberto Gonzales kag Justice Sec. Raul Gonzales.

Bag-o nga padihut

Pinakabag-o nga padihut ni Norberto Gonzales ang plano nga pagdalahig sa mga progresibong kongresista sa ginatuyo kuno nga asasinasyon sang BHB kay Gloria Arroyo, pila ka myembro sang iya kabinete kag pila ka personahe sa ligal nga oposisyon. Gusto sang Malakanyang

nga gamiton para diri si Philip Limjoco, nga ginkuot sang AFP Intelligence sa Dau, Mabalacat, Pampanga sadtong Mayo 7. Si Limjoco, isa sa masobra 40 katawo nga ginkasuhan sang himu-himo nga asunto nga rebelyon upod ang "Batasan 5", ginaakusar sang militar nga myembro sang BHB. Posible nga iprisintar siya bilang operatiba sang BHB nga ginmanduan magti-gayon sa ginhimu-himo nga planong asasinasyon nga ginasam-bit ni Gonzales. Sa sini maikarga man sang rehimen sa mga kaso nga ginpasaka batuk sa mga progresibong mamalidha ang bungang-isip nga planong asasinasyon.

Sa subong kapot sang mga operatiba sang Intelligence Security Unit sang AFP si Limjoco kag ginabawalan mag-angot sa iya pamilya kag mga abugado. Mahimo nga ituhaw siya sa palaabuton bilang "pamatuod" sa plano kuno nga asasinasyon para matum-ok ang "Batasan 5".

Sa atubang sang mga ini, labing nagalapnagon ang mga panawagan batuk sa pagpang-ipit sa mga tiglawas sang mga progresibong partido. Halin sa nagkalain-lain nga organisasyon kag insitusyon sa sulod kag guwa sang pungsod nga nagatib-ong sang katarungan, demokrasya, tawhanong kinamatarung, mga kinamatarung sa parlamento kag iban pa nga kinamatarung sibil, nagabuhos ang mga pagpakamalaut sa pagpang-ipit sa anum nga progresibong mamalidha. Lakip diri ang Inter-Parliamentary Union (IPU) nga nanawagan sa rehimeng Arroyo sining Mayo 12 nga hilwayon na si Ka Bel. **AB**



Nagadamu nga sablag sa cha-cha

Nagabaskog ang desperasyon sang Malakanyang sa atubang sang nagadamu nga sablag sa pagpasulong sini sang "cha-cha" ukon "charter change". Tuman nga nabudlayan ini nga likawan ang pagpamatuk sang daku nga mayorya sang mga senador sa ginapamilit sini nga pagtingub sang Senado kag Kongreso bilang Constituent Assembly. Sa pihak nga bahin naman, tuman kalapad sang pagpamatuk kag ligal nga sablag sa "people's initiative" bilang ikaduha nga pamaagi sang rehimen para baguhon ang sandigan nga layi.

Desperado ang rehimen nga ipatuman ang "cha-cha" pag-abot sang Hulyo agud idiskaril ang liwat nga pagpasaka sang kasong *impeachment* batuk kay Arroyo sa pagbukas sang Kongreso sa Hulyo. Gintilawan sini nga paamuhon ang mga senador nga nagtambong sa ginpatawag sini nga pulong sang Legislative Executive Development Advisory Council (LEDAC) sadtong Mayo 16 nga gintambungan man ni Arroyo, mga myembro sang kabinete kag mga kongresista. Pero wala ini sang naagum diri luwas sa promisa nga maghiwat sang dayalogo kaangot sa "cha-cha".

Pero bag-o pa man ini, wala untat ang atakehay sang mga senador kag kongresista. Wala nalingkang ang tindog sang mayorya sang mga senador nga iligal ang proposisyon nga tukuron ang *constituent assembly*. Ginapamilit sang mga senador nga ang mga pagbag-o sa konstitusyon mahimo tigayunon sa paagi pareho sang paghimo sang bag-ong layi (*legislated amendment*) kag nagakinahanglan sang $\frac{3}{4}$ nga boto sang kada panalغان. Buot silingon, magaboto sang separado ang Senado kag Kongreso, bagay nga di paborable sa Malakanyang, indi lamang sa ginalauman sini nga pagpamatuk sang Senado sa mga panugyan sini, kundi pati sa lawig nga abuton sang amo nga proseso. Luwas diri, ang pagtukod sang Constitutional Conven-

tion na lamang ang nabilin nga paagi para bag-uhon ang konstitusyon.


Samtang, nag-angkon sang magkasunod nga kadalag-an ang Committee for the Defense of Lawyers (CODAL) kag iban pa nga grupong anti-"cha-cha" batuk sa ginasulong nga "people's initiative" sang maki-Arroyo nga Sigaw ng Bayan. Napadaug sa mga Regional Trial Court sa Roxas City kag General Santos City ang pagpapanaug sang *temporary restraining order* (TRO) batuk sa "people's initiative". Ang mga TRO nga ini sablag sa beripikasyon sang Commission on Elections sa mga pirma nga nakalap kuno sang mga grupo nga Sigaw ng

Bayan samtang wala pa naresolbar sang Korte Suprema ang halambalanon. Tuman kadamu man ang nabuyagyag kag napamatud-an nga peke nga mga pirma.

Daku nga sablag ini sa kuno "people's initiative" bangud ginatada sang konstitusyon sang reaksyunaryong estado nga rekisito sa "people's initiative" ang pagtipon sang beripikado nga pirma sang 3% sang mga botante sa kada isa ka distrito.

Dugang diri, wala untat ang kampanya ang Catholic Bishops Conference of the Philippines (CBCP) batuk sa "people's initiative". Suno sa pahayag sang CBCP sadtong Mayo 11, labi ini nga natublag sa siling sini nga nagapadayon kag mapanipalang nga kampanya para mangalap sang mga lagda santo sa "people's initiative". Base kuno sa sarbey sang CBCP sa mga ginasakpan sang mga obispo sini, nausisaan sini nga lapnagon ang pagpamatuk sang pumuluho sa "people's initiative".

Kadungan sini, malinong nga nagamiting kag nagaplano ang oposisyon sa Kongreso, upod ang BAYAN, Bayan Muna kag pila pa nga grupong anti-Arroyo bilang paghanda sa panibag-o nga kasong *impeachment* batuk kay Gloria Arroyo. Ginasiguro man nila ang katampad kag kalig-on sang ila kubay. Luwas sa mga daan nga ginapasaka nga ebidensya, nadugangan pa ini sang mga ebidensya sang CCTA nahanungod sa pagdinaya sa eleksyon, pagpatay sang mga aktibista kag iban pa nga pasistang pag-abuso kag paglabag sa konstitusyon kaangot sang pagpagguwa sang Presidential Proclamation 1017, *calibrated pre-emptive response* (CPR) kag Executive Order 464. **AB**



Gloria Arroyo, may sala—CCTA

"May sala!" Ini ang husgar sang Citizens' Congress for Truth and Accountability (CCTA) batuk kay Gloria Arroyo. Mga kaso sang pagdinaya kag manipulasyon sa eleksyon 2004, lapnagon nga korapsyon kag paglapas sa tawhanong kinamatarung ang ginpasaka batuk kay Arroyo sa CCTA.


Ang 203-pahina nga husgar sang CCTA nga ginpagguwa sining Mayo 10. Lima ka bulan nga gintunan sang 15-katawo nga lupon sang mga hukom ang mga sinumpaang panaysayon sang 22 testigos nga nag-atubang sa lima ka pangpubliko nga pagbista sadtong Nobyembre 2005.

Sa partikular, napamatud-an sa CCTA nga nagdinaya si Arroyo kag ang iya katimbang nga kandidato nga si Noli de Castro sa mga prubinsya sang

Cebu, Pampanga, Iloilo, Bohol kag sa Autonomous Region for Muslim Mindanao. Gingamit man niya ang mga pangpubliko nga pondo para sa iya kampa-nya; kag ginpunggan ang pag-buyagyag sa iya mga krimen paagi sa mga polisiya nga *calibrated preemptive response*, Executive Order 464 kag Presidential Proclamation 1017.

May sala man si Arroyo sa lapnagon nga sistematiko nga kampa-nya sang pagpatay, pagkuot, pangpulitika nga paghigabot kag iban pa nga pagpang-abuso sa tawhanong kinamatarung halin sang magpungko siya sadtong 2001.

Gintawag man sang CCTA ang "chacha" bilang pinakadaku nga iskema ni Arroyo para takpan ang iya mga krimen



bangud sa katuyuan sini nga konsolidahon ang iya mga poder, waskon ang bilog nga oposi-syon kag ipahigad ang tanan nga halambalanon batuk sa iya.

Suno kay anay Bise Presidente Teofisto Guingona, tagapangulo sang CCTA, nagpresentar sang walo nga rekomendasyon ang CCTA lakip ang gilayon nga pagbiya ni Arroyo bilang presidente para manabat sa iya mga kasal-anan; panawagan sa pangkalibutanon nga komunidad nga kuhaan sang suporta kag pagkilala ang peke nga presidente Arroyo; pagpasaka sang kaso batuk kay Arroyo sa United Nations Human Rights Commission; kag pagbasura sa tanan nga mga mapiguson kag mapang-ulipon nga layi. AB

Rehimeng Arroyo, ginpakamalaut sang CBCP

Mabaskog nga ginpakamalaut sang Catholic Bishops Conference of the Philippines (CBCP) ang rehimeng Arroyo sining Mayo nahanungod sa mga di resolbado nga halambalanon angot sa pagdinaya sa eleksyon.

Sa iya pahayag sadtong Mayo 11, ginainsister sang CBCP sa rehimeng Arroyo nga dapat aathagon na sini ang nagkalain-lain nga isyu nga may kaangtanan tanan sa pagdinaya sa eleksyon 2004 pareho sang "Hello Garci" tapes, ang ginatus-gatos ka milyon pisos nga ginkurakot halin sa "fertilizer scam" nga ginasuspetsahan ginpondo sa kampanya ni Arroyo, ang wala pa maisapubliko nga kaundan sang Mayuga report kag mga anomalya nga ginadalahan sang mga upisyal sang Comelec.

Partikular sa "Hello Garci" tapes kag "fertilizer scam", ginapamilit sang CBCP ang pagpadayon sang mga ginsuguran nga pagbista sa Senado kag Kongreso nahanungod diri kag

ang pagreport sa bilog nga resulta sa publiko. Ginapamilit man sang CBCP nga isapubliko na ang bilog nga kaundan sang imbestigasyon nga gin-himo sadtong 2005 ni Vice Adm. Mateo Mayuga sang Philippine Navy nahanungod sa pagkadalahan sang mga matag-as nga upisyal militar sa lapnagon nga dinayaay sa eleksyon 2004 ilabi na gid sa Mindanao. Sa amo man, liwat ginainsister sang CBCP nga ireorganisa ang Comelec kag silutan ang tanan nga upisyal nga napamatud-an nadalahig sa mga maanom-alya nga kontrata. Ginkundenar man sang CBCP ang "people's initiative" bangud siling sini indi man ini ginumpisahan sang pumuluyo.

Hungod nga gin-utod sang rehi-men ang mga imbestigasyon sa Senado kag Kongreso nahanungod sa "Hello Garci" tapes sadtong katapusan sang Enero agud indi mabuyagyag sa publiko ang mga detalye sang pagdinaya sini sadtong eleksyon sang Mayo

2004. Ginatago man sang rehimen si anay Department of Agriculture Undersecretary Jocelyn Bolante, isa sa mga yabi nga personahe nga makahatag sang detalye nahanungod sa iligal nga paggamit sa kampanya pang-eleksyon ni Arroyo sa pondo nga dapat pangbakal sang abono. Ang kabilugan nga resulta sang imbestigasyon ni Mayuga nga sadtong Nobyembre 2005 pa natapos wala pa gihapon ginapubliko tubtub subong. Ang mga rekomendasyon naman nahanungod sa "paglimpyo" sa Comelec wala man gihapon ginaaktuhan ni Arroyo.

Siling sang CBCP, tubtub indi mapathag sang rehimeng Arroyo ang mga halambalanon nga ini, magapadayon ang simbahan Katoliko sa pagkundenar indi lamang sa kawadon sang moral nga basehan sang pagginahum sang rehimen kundi sa tanan nga kagarukan nga ginadalahan sang gubyernong Arroyo. AB



2 M16 naagaw sa Negros

Duha ka ripleng M16 ang naagaw sang isa ka tim sang Bag-ong Hangaway sang Banwa (BHB) matapos sini nga salakayon ang isa ka grupo sang Regional Moble Group (RMG) sang Philippine National Police (PNP) sining Mayo 20 sa Barangay Mabini, Escalante City, Negros Occidental.

Duha ka pulis ang napatay sa pagsalakay. Kabahin sila sa apat katawo nga tim sang 602nd RMG nga nagalantaw sang binayle sa baryo. Sinorpresa sila bandang ala-una sang kaaganhon sang apat nga Pulang hangaway. Nagtabang ang iban nga mga pulis pero nakaatras na ang mga gerilya. **AB**

Ambus sa Isabela

Pito ka suldado ang napatay kag siyam ang napilasan sang lambatan sang mga Pulang hangaway sang Bag-ong Hangaway sang Banwa (BHB) ang mga tropa sang 45th IB sa katung-anan sang Barangay Ueg kag Panninan sa San Mariano, Isabela sadtong Abril 2.

Nagapasulod ang mga suldado sa Barangay Panninan sang mamataan sila sang yunit sang BHB sa lugar. Ginlagas sila sang isa ka tim sang mga gerilya kag inabtan nagapahuway sa isa ka bulod. Gilayon nga nagpusisyon ang BHB, gintiro ang mga suldado kag ginpalukpan sang *rifle grenade*.

Madugay na nga nakaatras ang mga Pulang hangaway sang mag-abot ang reimporsment nga helikopter duha ka oras makaligad ang inaway.

Antes ang ambus, duha ka mangunguma halin sa Barangay Ueg ang ginkuot kag ginpangbakol sang mga suldado. Gindumilian man sang mga pasistang tropa ang mga mangunguma nga magkadto sa ila mga kaingin. Ginbantayan nila ang tanan nga talabukan sa suba kag ginapangitaan sang sedula ang tanan nga tagabaryo.

Ang ambus nagserbi nga silut sa 45th IB sa pagpamintas sini sa pumuluyo sa lugar kag amot sang BHB sa pagpadasig sang pagpukan sa rehimeng Arroyo. **AB**

10 armas, naagaw sa Samar kag Leyte

Napulo ka armas ang naagaw sang BHB sa mga taktikal nga opensiba sini sa Samar kag Leyte sining Mayo 5 kag 6, suno sa pinakaulihi nga mga report halin sa prente.

Sa Eastern Samar, apat ka riple nga M16, duha ka pistolang 9 mm kag isa ka .357 ang naagaw sang BHB sang ambuson sini ang anum nga pulis sa Bonghon, Dolores, Eastern Samar sadtong Mayo 6, suno sa Sergio Lobina Command. Nauna nga nareport sang *AB* nga lima ka M16 ang naagaw sa nasambit nga pagpanglambat. Isa ka pulis ang napatay kag duha ang napilasan sa ambus samtang isa ang sumurender kag ang duha nga iban pa nagpalagyo. Gindapatan sang *first aid* ang mga napilasan kag maayo man nga gintrato ang nagsurender nga pulis, baliskad sa ginpamalita sang kaaway.

Sa Leyte, duha ka M16 ang naagaw sang BHB sang ambuson sini ang mga tropa sang 19th IB sa Sandayong, Hibalangan, Villaba sadtong Mayo 5. Dua ka suldado ang napatay kag duha ang nasugatan sa pagpanglambat nga naglawig lamang sang 15 minutos, suno sa Mt. Amandewin Command (MC) sang BHB-Leyte Island.

Ginpanginwala man sang MAC ang ginpalapta ni Lt. Col. Lope Dagoy sang 19th IB nga ginlapas sang BHB ang mga pangkalibutanon nga layi sang gera sang sunugon kuno sini ang bangkay sang isa sa mga namagtay nga suldado. Suno sa BHB-MAC, nasunog ang bangkay sang magdabdab ang gasolina nga dala-dala sang mga suldado sa ila salakyan bunga sang pag-igo sini sang *command-dettonated land mine*.

Suno pa gid sa BHB-MAC, ang 19th IB ang tunay nga nagalapas sa tawhanong kinamatarung bangud sa pagpatay sini kay Jessie Talaboc, isa ka sibilyan nga ginapasibangdan Pulang hangaway. Si Talaboc, isa ka residente sang Sityo Can-ili, Barangay Dunghol, Ormoc City ginkuot, tinortyur kag ginpatay sang mga tropa sang 19th IB sadtong Mayo 7 kag ginprisintar bilang kaswalti kuno sang BHB.

Ini matapos mapaslawan ang 19th IB nga makapatay ukon makadakup sang bisan isa ka Pulang hangaway sa reyde sini sa isa ka kampo sang BHB sa Sityo Pikas sang nasambit nga barangay sadtong adlaw nga ina. Napilasan, nakibot kag nahadlukan ang mga sumalakay nga suldado sang magsigabong ang mga *commnad-dettonated land mine* nga gintanum sang BHB sa perimetro sang kampo gani wala na nila ginlagas ang mga Pulang hangaway nga nakaatras nga wala kahalitan. Duha ka *blocking force* man sang kaaway ang ginpalukpan sang mga isnayper sang BHB ang wala man makabato. **AB**

Interbyu kay Jorge "Ka Oris" Madlos

Nagabwelo ang rebolusyon sa Mindanao

Padayon nga nagaagum sang bulawanon nga kadalag-an ang rebolusyonaryong kahublagan kag pumuluyo sa Mindanao. Sa pagpakighinun-anon sang *Ang Bayan* kay Kaupod Jorge "Ka Oris" Madlos, tagapamaba sang National Democratic Front-Mindanao, ginpaambit niya nga ang rebolusyonaryong hublag sa isla nagasakup na sang 19 sa 25 prubinsya. Nagalab-ot na sa 200 banwa kag syudad sini ang sakup sang 35 prenteng gerilya sang BHB.

"Ang Mindanao isa ka manggaranon nga isla," siling ni Ka Oris, "pero mayorya sa masobra 17 milyon nga populasyon sini nagakalisod, pigos kag ginahimuslan sang mga higante nga imperyalistang korporasyon, dalagku nga burgesya kumprador kag dalagku nga agalon nga mayduta."

Indi katingalahan, kon amo, nga mabaskog lunsay ang hayag kag armadong pagbato sang pumuluyo diri. "Diri ang lehitimo nga pagbato sang mga Moro paagi sa MNLF kag MILF. Mas lapnagon ang pagbato sang pumuluyo sa pagpanguna sang PKP-BHB-NDF."

Pamatuod sini ang 412 magagmay kag dalagku nga taktikal nga opensiba nga ginlunsar sang BHB sa Mindanao sa nagligad nga 16 ka bulan. Pinakamadamu diri ang nalunsar sa ulihi nga bahin sang 2005. Nakagaw ang mga Pulang hangaway sang masobra 300 nga nagkalain-lain nga klase sang armas. Masobra 300 reaksyunaryong tropa ukon katumbas sang isa ka batalyon ang namatay sa mga inaway. Halos 300 man ang napilasan sa ila tropa sa panahon nga ini. "Naangkon naton ang mga kadalag-an nga ini sang halos wala kasamaran sa aton mga pwersa," dugang pa ni Ka Oris.


Tampok sa mga taktikal nga opensiba ang madinalag-on nga paglusob sa anum nga *municipal station* sang PNP kon sa diin nakaagaw ang BHB sang masobra 80 nga nanari-saring kalibreng pusil kag mga

reйд sa duha ka dalagku nga detasment sang AFP-CAFGU. Tampok man ang lima ka mayor nga ambus kag duha ka espesyal nga operasyon.

Ini ang sabat sang rebolusyonaryong pwersa sa Mindanao sa pagdamul sang pwersa sang reaksyunaryong hangaway sa isla. Suno pa kay Ka Oris, "sa nagligad nga pila ka tuig 70% sang tatlo ka dibisyon sini ang nakabase sa Mindanao ang ginatambak sang rehimeng Arroyo sa mga prenteng gerilya sang BHB. Lakip sa mga pwersa nga ini ang Marine kag Special Forces."

Sa idalum sang Oplan Bantay Laya, naglunsar ang AFP sa Mindanao sang mas brutal nga mga operasyong militar sa kaumhan kag lapnagon nga pagpamatay sa mga lider kag katapu sang mga lehitimo nga organisasyong masa kag partido.

Sa amo man, napaslawan ini sa pagpugong sa pagbwelo indi lamang sang malapad nga kahublagang masa batuk sa pagginahum ni Arroyo kundi ang kumprehensibo nga pagsulong sang rebolusyonaryong kahublagan sa bilog nga isla.



"Buhi pa ako"

Pila ka adlaw antes ginhimo ang interbyu kay Ka Oris sa isa ka hedkwarters sa Caraga region sadtong ulihi nga bahin sang Abril, ginpalap-ta sang AFP ang balita nga siya patay na. Ginapagguwa sang AFP nga siya napatay sa isa ka inaway sa Paquibato District sa Southern Mindanao; kag sang wala mapamatud-an ginsiling nga namatay siya tuga sang malala nga balatian.

Nakakadlaw nga ginpangin-wala ini ni Ka Oris kag naghambal "buhi pa ako!" Siling niya, maathag nga katuyuan sang militar nga tilawan nga idemoralisa kag gamuhon ang mga rebolusyonaryong pwersa kag pumuluyo paagi sang mga sugilanon nga ini. Bulag ang militar sa matuod niya nga kahimtangan kag ginahamtangan gani pati ang midya gintilawan sini nga gamiton sa pagpangita sa iya.

AB



Batuk sa RSOT kag strike operations sang AFP sa Northeastern Mindanao

Matinugahon kag matalum nga taktika

Mataas nga kahandaan kag ikasarang lunsay sang Bag-ong Hangaway sang Banwa (BHB) kag sang pumuluyo sa Front 14 sang Northeastern Mindanao Region nga paslawon ang mga operasyong militar sang mga reaksyunaryo nga armadong pwersa kag maglunsar sang mga taktikal nga opensiba. Bunga ini sang naabot nga hugot nga paghiliusa sa mga prinsipyo kag diwa sang armadong rebolusyon, kasanyugan sang mga Pulang kumander kag hangaway kag mataas nga lebel sang militansya kag kalig-on sang pumuluyo sa lugar.

Umpisa sang matukod ang prente nga ini sadtong 1998, nagapadayon ang pag-angkon sini nga mga kadalag-an sa armadong paghimakas, pagtukod sang baseng masa kag rebolusyong agraryo. Halin sa umpisa wala pa makaagi sang depensibo ang ano man nga yunit sang BHB diri. Ano man nga operasyon sang kaaway, ano man kadaku ang pwersa nga ginadala sini, permi nga nakakita sang pamaagi ang pumuluyo kag BHB agud idiskaril kon indi man direkta na pagpaslaw sa mga ini.

Sa tanan nga inaway, katuwang sang mga Pulang hangaway halin sa paghanda—paniktik, sarbeylans, paghanda sang *ambush sites* tubtub sa aktwal nga paglunsar sang mga taktikal nga opensiba—ang mga elemento sang milisya sang pumuluyo.

Pagbato sa mga *strike operation*

Isa ka halimbawa sini ang pagpaslaw sang BHB sa daku nga operasyon sang AFP halin Marso 2 tub-



tub 12 nga nagatuyo nga tabugon ang mga Pulang hangaway sa OP. Naglab-ot sa 500 pwersa sang Military Intelligence Battalion, 36th IB kag iban pa nga mga yunit militar ang naglunsar sang mga *clearing operation* sa magkatambi nga halos 20 baryo sa lindero sang Agusan del Sur kag Surigao del Sur.

Gilayon nga ginpreparahan sang BHB ang pagsulod sang daku nga tropa. Gintumod sang mga nakatalana nga yunit ang mga ginaagyan sang mga suldado kag gintun-an ang mga ini agud himuan sang *ambush site*. Gintamnan ang mga ini sang mga *command-detonated land mine* kag hugot nga ginpanilagan.

Halin sa higad sang haywey tubtub sa mga interyor nga baryo, ginabantayan sang tagabaryo nga gintumod bilang mga espesyal nga paniktik ang mga hulag sang AFP kag maid-id nila ini nga ginasundan. Kada may kumpirmadong paghulag sang ano man nga bahin

sang tropa, gilayon na nagadeploy sang isa tubtub duha ka tim ang sentrong kumand sang BHB agud maglunsar sang mga operasyong harasment. Mga isnayper tim nga ginatapuan sang apat tubtub lima nga Pulang hangaway nga may dala nga mabaskog nga riple ang ginamandu nga magdukot sa mga ginaagyan sang magasulod nga pwersa. Bunga sini, indi lang nga nabangan sang BHB ang mga suldado, nakadulot pa ini sang kahalitan.

Isa ka halimbawa sini ang operasyong harasment nga gintigayon sadtong Marso 5 kon sa diin nakaengkwentro sang ginapadala nga tim sang BHB ang ila target nga isa ka platoon sang Scout Rangers nga hinali nagsulod sa isa ka sityo sa Surigao del Sur. Una nga nakapalupok kag nakapusisyon ang mga tropa sang kaaway gani napilitan nga umatras ang tim sang BHB. Nakasulod sa baryo kag pumususyon ang nasambit nga tropa sa isa ka




balay kag ginhimo nga panaming ang pamilya didto. Gilayon nga naghulag ang tagabaryo kag ginsalbar ang pamilya gani nabilin nga bulnerable sa atake sang BHB ang mga suldado. Sa hapon man nga ina, kinumando kag ginpalukpan sang mga hangaway ang mga suldado agud tabugon sila sa baryo. Duha ang gilayon nga napatay kag napilasan ang iban pa.

Bisan wala pa man makasulod ang mga tropa sang kaaway, nahalitan na sila sang mga atake sang BHB. Sadtong Enero 29, gin-ambus sang mga hangaway ang anum nga suldado nga nagserbi nga *advance scouting team* sang 36th IB sa isa ka baryo sa Bislig City. Isa ang gilayon nga napatay kag napilasan ang iban pa.

Pagbato sa RSOT

Madinalag-on man ang pagbato sang pumuluyo kag sang BHB sa mga operasyon sang RSOT sa lugar. Halin Agosto 15 tubtub Septyembre sadtong nagligad nga tuig, naglunsar ang 36th IB sang mga operasyong RSOT sa lima nga magkatambi nga baryo sa Surigao del Sur kag Agusan del Sur. Ginplano sang militar nga maglawig sa lugar sang tubtub anum ka bulan agud makatukod sang mga kontra-rebolusyonaryong *barrio intelligence network* (BIN), makarekruta sang mga elemento para sa CAFGU kag sa ulihi makatukod sang detachment. Sa aktwal, nakalawig lamang sang 45 adlaw ang mga suldado bag-o madinalag-on nga napalayas sang pumuluyo kag sang BHB.

Antes pa man magsulod ang mga tropa nga magalunsar sang RSOT, nagpahayag na ang pumuluyo sa lugar sang ila pagpamatuk sa pagahimuon nga operasyong militar. Ginpangayo nila ang bulig sang



lokal nga gubyrno, mga institusyon kag simbahan agud ipamilit ang gilayon nga pag-atras sang kaaway.

Sa sulod sang mahaba nga panahon, biktima sang pang-abuso sang militar ang pumuluyo diri. Permi nga katuwang sang mga bayaran nga buyong sang PICOP ang AFP sa pagguba sang ila mga balay, paggabot sang ila mga pananum kag pagsunog sang ila mga propyedad sa tuyo nga palayason sila sa lugar. Kon ngaa amo na lamang ang ila pagpamatuk sa militar.

Sadtong Septyembre, sistem-atiko kag madasig nga ginpatuman ang organisado nga ebakwesyon sang isa ka sityo sa Rosario, Agusan del Sur pila ka adlaw matapos magsulod ang mga tropa sang kaaway diri. Sa bulig sang simbahan kag mga lokal nga upisyal, pila ka adlaw nga nagpabilin sa sentrong banwa ang pila ka gatos nga pamilya. Nagbalibad sila nga magbalik sa ila lugar tubtub yara pa ang mga suldado. Katuwang ang iban pa nga sektor, mabaskog nila nga ginhingyo sa meyor kag iban pa nga mataas nga upisyal nga gilayon na nga pahalinon ang RSOT sa ila baryo.

Sa isa pa nga kahigayunan, gulpe nga ginsulod sang isa ka platoon sang 36th IB ang isa ka sityo sa Bunawan, Agusan del Sur sang wala mamutikan sang tagabaryo.

Gilayon nga naghanda ang pumuluyo diri para magbakwet kag nagkadto sa pamalay sa sentro sang sityo. Sang mamutikan sang nasambit nga yunit sang kaaway nga nagahanda na nga magbakwet ang tagabaryo, gilayon sila nga naghalin. Wala na ginpadayon sang pumuluyo ang ebakwesyon.

Labi pa nga pasingkion sang BHB ang paglunsar sang mga taktikal nga opensiba sa atubang sang mga operasyon sang AFP.

Sa umpisa pa lamang sang mga operasyong RSOT, naglunsar na sang mga operasyong harasment, isnayping kag mga ambus ang mga Pulang hangaway agud magdulot sang kahalitan sa militar kag paatrason ang mga ini.

Apat ka beses na nakalunsar sang mga operasyong harasment ang BHB batuk sa mga RSOT sa sulod sang panahon nga ini. Bangud sa sobrang kahadlok sang mga suldado, nagapabilin lamang sila sa mga sentro sang ila ginatarget nga sityo kag indi na maglunsar sang mga aktibidad sa mga palibot sini. Halos tig-pila ka adlaw lamang ang ila paglawig sa lugar antes sila napilitan nga mag-atras.

Paagi sa matinugahon nga mga maniobra kag malig-on nga pagbato sang pumuluyo, kadungan ang aktibo kag maayo nga pagpalunsar sang mga taktikal nga opensiba sang BHB, napaslawan ang mga operasyon sang RSOT. Ang eksperensya nga ini nagapadayon nga nagapataas sa militansya sang pumuluyo kag labi nga nagapasanyog kag nagapatalum sa mga yunit sang BHB. Ini man ang nagahanda sa ila pag-atubang sa mga kasunod nga mga operasyon sang AFP.

AB

Kaaway sang imperyalismo kag abyan sang pumuluyong Pilipino

Kaisa sang Partido Komunista sang Pilipinas (PKP) ang nagkalain-lain nga organisasyon kag indibidwal sa US, sa Pilipinas kag sa bug-os nga kalibutan sa paghatag sang pinakamataas nga pasidungog kay Daniel Boone Schirmer—isa ka tunay nga patriyotikong Amerikano, rebolusyonaryong internasyunalista, malig-on nga anti-imperyalista kag matutom nga tagasuporta sang paghimakas sang pumuluyong Pilipino kag sang tanan nga pigos nga pumuluyo.

Ginakilala sang PKP ang bug-os kabuhi nga dedikasyon ni Daniel Boone Schirmer sa pagbato sa imperyalismong US kag sa pagpamigos sini sa pumuluyo sa bilog nga kalibutan. Namatay si Schirmer sa US sadtong Abril 21 sa edad nga 91.

Nagbulig si Daniel Boone Schirmer sa pagpukaw, pag-organisa kag pagpahulag sa mga estudyante kag mamumugon sadtong dekada 1930 para ipakigbato ang ila mga kinamatarung sadtong Great Depression. Nangin katapu siya sang Partido Komunista sa US sadtong dekada man nga ini. Sadtong 1950, apat ka tuig siya nga ginlagas kag napilitan nga maghulag sang tago, tubtub arestuhon siya kag ginhunong sang gubyernong US sadtong 1954 sa kainitan sang anti-komunista nga McCarthyistang isterya. Sang bumalik siya sa unibersidad sadtong dekada 1960, aktibo siya nga naghulag batuk sa gerang agresyon kag pagpanakup sang US sa Vietnam.

Sadtong 1969 ginsulat ni Daniel Boone Schirmer ang iya *doctoral thesis* nga ginatig-uluhan "Republic or Empire: American Resistance to the Philippine War," nga sang ulihi ginbalhag bilang libro. Natumod sang

atensyon ang tesis niya sa Anti-Imperialist League, isa ka organisasyon sang mga makabanwa nga Amerikano nga ginapamunuan sang Amerikano nga nobelista nga si Mark Twain, nga batuk sa gera sang US agud himuon nga kolonya ang Pilipinas sa pagbukas sang ika-20 siglo. Gina-insister niya nga indi mahimo kabigon sang US ang kaugalingon sini bilang demokratikong pungsod samtang ginaulipon sini ang iban nga pumuluyo.

Sa tradisyon sang liga kag ni Mark Twain, nangin mapisan nga tagadepensa si Schirmer sang pangkalibutanon nga paghiliusa nga anti-imperyalista kag tubtub sa iya ulihi nga kabuhi aktibo niya nga sinuportahan ang paghimakas sang pumuluyong Pilipino batuk sa imperyalismo, pasismo kag reaksyon.

Matuod nga abyan sang pumuluyong Pilipino si Daniel Boone Schirmer. Upod sang iban pa nga Pilipino nga nagapuyo sa US, mga Pilipino-Amerikano kag iban pa nga progresibong Amerikano nga abyan sang pumuluyong Pilipino, nagbulig

siya nga tukuron ang Friends of the Filipino People (FFP) bilang sabat sa pagpanaug sang pasistang diktadura sa Pilipinas sa sugyot sang US, kag para suportahan ang anti-imperyalista kag antipasista nga paghimakas sang pumuluyong Pilipino.

Maukod niya nga ginasundan ang mga hitabo sa Pilipinas kag sumulat siya sang madamu nga libro bahin sa kahimtangan diri kag sa sini nakabulig siya sa pagbuyagyag sa pumuluyong Pilipino kag sa bilog nga

kalibutan sa pagpakatuta ni Marcos sa US kag mga pasistang abuso sang diktaduryang US-Marcos.

Katuwang sang iya mga upod sa FFP, signipikanteng nakaamot si Schirmer sa US sa pagkundenar sa paghimbunanay at suporta sang US sa diktaduryang Marcos kag bunga sini nakatipon sila sang suporta para sa paghimakas sang Pilipino halin sa pumuluyong Amerikano kag napabaskog ang paghimakas sang mga Pilipino nga nagapuyo sa US. Nakabulig ang ila hilikuton para mahayag, nahamulag kag sa ulihi mapukan ang pasistang diktadurya.

Ang presensya sang mga base militar sang US sa Pilipinas yabi nga halambalanon nga tinum-ukan ni Schirmer sa sulod sang tatlo ka dekada. Sumulat siya sang madamu nga artikulo kag naghambal sa mga rali, simposyum kag iban pa nga pagtilipon para ipanawagan ang pagbungkag sa mga base militar sang US sa Pilipinas. Sa

"Schirmer..." sundan sa pahina 12

"Schirmer...", halin sa pahina 11

makasaysayan nga boto sang Senado nga tumapos sa katunga sa siglo nga pagluntad sang tratado nga nagapahanugot sa permanente nga mga base militar sang US sa pungsod, ginpasidungan siya sang Senado sang Pilipinas bilang isa sa mga pangunahon nga impluwensya para tapuson na ang tratado.


Matapos mabungkag ang mga base sang US, padayon nga ginpakamalaut ni Schirmer ang kada padihut sang mga gubyrno sang US kag Pilipinas para labi nga lapason sang US ang soberanyang Pilipino paagi sa pagpadala sang mga mapanghilabot nga tropa pangkombat sa pungsod kag pagtransporma sa bilog nga pungsod daw bilang base militar paagi sa nagakalain-lain nga tratado kag kasugtanan pareho sang "Mutual Logistics Support Agreement," "Status of Forces Agreement," "Access and Cross-Servicing Agreement" kag "Visiting Forces Agreement."

Ang matalum kag maayo nga pagpanalawsaw nga mga sinulatan, diskurso kag iban pa nga importante nga amot ni Daniel Boone Schirmer sa paghimakas batuk sa imperyalismong US, sa diktaduryang US-Marcos kag sa nagasangyog nga himbunanay sang US kag sang mga sumunod pa nga papet nga rehimen sa Pilipinas nagaserbi subong nga pabalon kag inspirasyon sa madamu nga Amerikano kag Pilipino kag iban pa nga rebolusyonaryo kag progresibong pwersa para padayunon ang pagsulong sang rebolusyonaryong paghimakas sa kaugalingon nga pungsod, itib-ong ang rebolusyonaryong internasyunalismo kag suportahan ang mga rebolusyonaryong paghimakas sa iban pa nga pungsod.

AB

Pagpaniktik kag pagpasilabot sang US sa pangpulitika nga Pilipino

Matapos ang siyam nga bulan nga pagkapreso, gin-ako sining Mayo sang isa ka ahente sang Federal Bureau of Investigation (FBI) sang US nga illegal siya nga nagpagguwa sang mga sikretong dokumento halin sa ginatrabahuan niya nga upisina sang FBI kag ginhatag ini sa pila ka dalagku nga pulitiko sa Pilipinas. Si Leandro Aragoncillo, isa ka Fil-Am, anay taga-analisa sang mga datos paniktik nga ginakalap



sang FBI bahin sa Pilipinas kag anay adbayser militar man sa duha ka magkasunod nga bise-presidente sang US. Nagserbi man siya nga suldado sang US Marines sa sulod sang 21 anyos. Ginaresto siya sadtong Septyembre 2005 sa kaso nga pang-espiya para sa pila ka personaheng Pilipino.

Pero ang matuod, si Aragoncillo isa ka tinawo sang US nga nang-espiya sa Pilipinas. Ginkasangkapan siya agud mangalap sang impormasyon bahin sa pungsod nga magamit sa pag-interbenar sa mga internal nga halambalanon sang Pilipinas sa katuyuan nga amligan kag isulong ang interes sang US. Matuod nga mas nagatampok subong amo ang pagpakig-angot niya kanday anay presidente Joseph Estrada kag iban pa nga oposisyunista, indi lipod nga aktibo man siya nga nakig-angot sa mga yabing upisyal kag alyado sang gubyrno tulad nanday Mike Defensor kag Cong. Rodolfo Albano sang Isabela.

Ang trabaho ni Aragoncillo para sa US nagakumpirma sa madugay na nga ginahimo nga pagpaniktik kag pagtipon sang US sang impormasyon bahin sa sensitibo kag pangsulod nga halambalanon kag hitabo, mga upisyal sang gubyrno, oposisyon kag yabing personalidad sa papet sini nga estado.

Sa aktwal amo nga nagapaniktik ang US sa tanan nga pungsod, lunsay sa mga abyan kag kaaway sini nga estado. Ang pagpang-espiya sini sa Pilipinas, kag amo man sa iban nga pungsod, indi lamang para hibalon kag tun-an ang importante nga hitabo kag pangsulod nga halambalanon diri. Ginagamit sang US ang natipon nga impormasyon pangunahon agud intrahan kag manipulahon ang mga hitabo kag halambalanon suno sa interes sini kag kasangkapan ang impluwensya, pagpanuhol, pagmanipular tubtub pagpanglubag kag pagpang-ipit sa nagkalain-lain nga upisyal kag personahe sang gubyrno, oposisyon kag iban nga sektor sa pungsod.

Ang mga ginhayag nga mga "analisis" sang mga upisyal sang gubyrnong US kag pati sang mga upisyal sang embahada sang US sa pungsod bahin sa pangpulitika nga sitwasyon diri nagaunod (sa direkta ukon indirekta nga paagi) sang mga mandu, paandam kag gusto nga matabo sang US. Mas madamu pa ang wala naihayag kag ginagamit sa nagkalain-lain

"Paniniktik...", sundan sa pahina 13

Pagpang-espiya sang US sa kaugalingon nga pumuluyo

Ginatiktikan sang rehimeng Bush pati ang kaugalingon sini nga pumuluyo. Nabuyagyag sining Mayo nga matapos ang mga teroristang atake sadtong Septyembre 11, 2001, ginmandu kag ginapaturan sang rehimen ang lapnagon nga pagpang-espiya sa pumuluyong Amerikano paagi sang pagtiktik sa ila mga rekord sa telepono kag sa ila sulatanay sa internet.

Inobligar sang National Security Agency, isa ka espesyal nga ahensya paniktik nga nakatumod sa elektronikong komunikasyon, ang tatlo ka higante nga kumpangyang telekomunikasyon sa pun-god nga ihatag sa gubyerno ang rekord sang mga tawag sang ila milyun-milyon nga kliyente. Gin-pangayo man sini ang imporma-syon kaangot sa mga pribado nga sulat nga nagaagi sa mga kumpa-nya. Gingamit sang NSA ang mga rekord nga ini agud padayon nga sundan ang elektronikong komu-nikasyon sang pumuluyo sa ngalan sang "pagtumod sang posible nga mga aksyong terorista."

Hugot nga ginadumili sang mga layi sa US ang pagpanilag sa pumu-luyo nga wala sang mandamyento halin sa korte. Gilayon kag mala-paran ang protesta nga nagsug-alaw sa ginatawag pinakamalapad nga paglapas sa mga tawhanong ki-namatarung sibil sang pumuluyo nga Amerikano. Ginaimbestigahan ini subong sa Senado sang US.

Ginkasuhan man sang paglapas sa mga kinamatarung sibil kag pri-basiya sang mga kliyente sini ang AT&T, isa sa mga higanteng kumpa-nya nga telekomunikasyon nga nakig-areglo sa NSA. AB

"Pagpaniktik....," halin sa pahina 12

nga paagi sang pagpasilabot sang US.

Ginapat-ud sang US nga "may kapot ini nga alas" nahanungod sa ano man nga bahin sang reaksyu-naryong pulitika. Maathag ini nga nakita sa kaso ni Aragoncillo kag mga kuno impormasyon nga nakalap niya.

Sa isa ka bahin, gingamit sang US ang pagbuyagyag kay Arag-oncillo kag ang pagdalahig sini sa kampo Estrada agud ipabatyag sa ila nga sila kapot sang US. Sam-tang padayon nga ginabatiti sang US bilang "reserbang kabayo" san-day Estrada kag iban pa nga reaksyunaryong lider sa pulitika, tuso nga ginabuyagyag sini sa re-himeng Arroyo ang mga impor-masyon kaangot sa kampo ni Estrada.

Sa pihak na bahin, ginagamit man sang US ang nakalap sini nga impormasyon agud paandaman kag ibutang sa alang-alang si Arroyo. Ginpabay-an sang US nga ibuyagyag sa publiko ang sikreto nga report sang US State Depart-

ment sadtong Hulyo 2005, amo man ang report ni Joseph Mus-somelli nga sadto *charge d'affairs* (tagadumala) sang embahada sang US sa Pilipinas. Tinalakay sa mga report nga ato ang mga akusasyon sang pagdinaya sa eleksyon, ko-rapsyon, pagpang-abuso sa gahum, bagsak nga popularidad ni Arroyo kag ang kuno malagana nga pag-atubang sa problema sang "terorismo" sa pungsod.

Bilang dugang nga presyur, ginpabay-an sang US nga maglap-ta ang mga bulu-balita nga may yara nga kapot nga ebidensya ang US nahanungod sa kinawatan nga manggad sang pamilya ni Gloria Arroyo. Gingamit sang US ang re-port nga ini agud ipabatyag sa re-himen nga may kapot ini nga im-pormasyon nga mahimo ikasamad ni Arroyo kag itum-ok sa iya "kon sin-o ang tunay nga hari." Sa sini, mas mapat-ud nila nga mapabilin nga sunud-sunuran ang subong nga pangunahon nga idu-ido nila sa ila mga dikta kag makapuga sang maksimum nga konsesyon halin sa iya sa kapuslanan sang US. AB

Nasyunalisasyon sang natural nga gas sa Bolivia

GINPAKITA sang bag-o nga gubyer-no sang Bolivia sa idalum ni Pres. Evo Morales ang d eterminasyon si-ni nga sundon ang dalan sang paghilway sa imperyalismo. Gin-deklarar ni Morales sining Mayo 1 ang pagnasyunalisa sang industriya sang natural nga gas bilang kabahin sang pagnasyunalisa sa ulihi sang bilog nga industriya sang enerhiya. Pagadumalahan na ini sang Yacimientos Petroliferos Fiscales Bolivianos, isa ka korpo-rasyon nga ginapanag-iyahan sang estado sang Bolivia.

May yara nga 20 dumuluong nga kumpanya nga nagakontrol sa in-dustriya sang enerhiya sa Bolivia,

lakip ang British Gas, British Petro-leum, ExxonMobil kag Total. Gin-hatagan sila sang gubyerno sang Bolivia sang anum ka bulan para sa renegosasyon sang ila mga kontra-ta. Sa panahon nga ini, pagakuhaon sang estado ang 82% nga kita sang mga kumpanya. Ginalauman nga malab-ot sa \$780 milyon sa 2007 ang kita sa produksyon sang gas halin sa \$460 milyon sadtong 2005. Kon indi sila makig-areglo, palaya-son ang mga kumpanya nga ini kag kumpiskahon ang propyedad nila. Nagapangaduha ang Bolivia sa mga pungsod sa Latin America nga may daku nga reserba sang natural nga gas. AB

Serbisyo sibil, ginababoy sang Malakanyang

GINA-INITAN subong sang Malakanyang ang pinuno sang Civil Service Commission (CSC) kag tagapangulo sang Career Executive Service Board (CSEB) nga si Karina Constantino-David bangud sa mga deklarasyon niya kag sang CSEB sang sini lang nga lapas sa layi kag interes sang serbisyo sibil ang pila ka desisyon kag tikang sang Malakanyang. Partikular nga gintumod sang CSEB ang pagpahalin sang Malakanyang sadtong Setyembre 2005 kay Juan Miguel Luz bilang Undersecretary sang Department of Education (DepEd) matapos magbalibad si Luz nga iproseso sang DepEd ang tatlo ka tseke nga nagabalor sang 15 milyon nga

pangsuhol kay Cong. Antonio Diaz sang Zamables kabaylo sang indi niya pagsuporta sa kaso nga *impeachment* kontra kay Gloria Arroyo.

Nauna na nga ginpaboran sa CSC ang desisyon sang Malakanyang nga pahalinon sa DepEd si Luz sa pihak sang pagpamatuk diri ni David bangud kontrolado ni Arroyo ang duha sa tatlo ka myembro sini. Pero sin-ing Mayo nagpagguwa sang resolusyon ang CSEB nga nagakundenar sa wala pagrespeto sang Malakanyang sa mga layi nahanungod sa serbisyo sibil. Ang CSEB ang ahen-sya nga nagapadalagan sa mga nagapamuno nga pusisyon sa pung-sodnon nga gubyrno kag mga kor-

porasyon nga ginapanag-iyahan sang estado.

Bangud sa pagsuay sang CSEB sa kagustuhan sang Malakanyang, ginpahalin ni Arroyo ang mga nagapabor kay Luz diri kag ginbayluhan sila sang mga tinawo nga tampad sa Malakanyang.

Ginahimo man nga inutil ni Arroyo ang CSE bangud indi sini makontrol ang pinuno sini nga si David. Hungod subong nga wala ginapuno sang Malakanyang ang mga nakabakante nga pusisyon sa CSC bangud samtang indi ini kom-pleto wala sang pwede nga desisyon ang CSC. Ginaluto na sang Malakanyang ang pagpahalin kay David pareho sa CSEB kag CSC.

Lafayette, ginapabayad, ginapalayas

GINAREKOMENDAR sining Mayo 19 sang Rapu-Rapu Fact-Finding Commission nga ginapamunuan ni Bishop Arturo Bastes sang Sorsogon nga pabayaron sang danyos perwisyo ang Lafayette Mining Ltd., isa ka kumpanyang Australian, bangud sa halit nga gintuga sini sa palibot sang isla sang Rapu-Rapu sa Albay kag sa ikaayong lawas kag pangabuhian sang pumuluyo didto. Ang komisyon nga gintukod sang Malakanyang sadtong nagligad nga tuig.

Suno sa komisyon, “iresponsible nga gin-umpisahan sang Lafayette ang operasyon nga pagmina bisan indi pa tapos ang imprastruktura para sa proteksyon sang kapalibutan.” Kinastigo man sini ang gubyr-nong Arroyo sa pagpabaya sini kag kapaslawan nga imonitor ang operasyon sa pagmina sa Rapu-Rapu.

Sa imbestigasyon nga ginhiwat

sang Komisyong Bastes, napamatud-an nga iresponsable nga ginabuhos sang Lafayette sa duha ka sapa ang *mine tailings* (higko gikan sa pagmina) nga *cyanide* kag iban



pa nga makahililo nga kemikal halin sa pagmina sang bulawan. Tuga sini, nagkalapatay ang mga isda kag iban pa nga organismo sa palibot sang Rapu-Rapu. Nakangkon man sang mga malubha nga balatian ang mga tawo nga yara sa palibot sini, pareho sang mga balatian sa

panit. Malala pa, ang higko halin sa mina mahimo magtuga sang kanser, sakit sa utok, pagbun-ag sang mga di-normal nga lapsag kag iban pa nga malubha nga balatian.

Gina-insister sang komisyon nga pabayaron ang Lafayette sang danyos perwisyo. Ginrekomenda man sini ang pagkanselar sa “environmental compliance certificate”

nga nagapahanugot sa Lafayette nga mag-operasyon sa Pilipinas kag pagbawi man sa insentibo nga ginhatag diri lakip ang eksempsyon sa pagbayad sang buwis. Ginrekomenda man sini ang pagpauntat sang pagmimina sa Rapu-Rapu.

Ginrekomenda man sang komisyon ang gilayon nga pagpauntat sang pagmina sang Lafayette sa Rapu-Rapu kag ang pagrepaso sang mismo nga 1995 Mining Act, sa partikular, ang mga probisyon sini nga nagapahanugot sa pagpanag-iyaga kag pagpadalagan ang mga dumuluong nga operasyon sang pagmina sa Pilipinas.

Tulad sang ginalauman, gilayon nga ginabalibaran sang Malakanyang ang mga rekomendasyon nga ini.

Ang Lafayette amo ang isa sa mga una nga kumpanya nga nagumpisa sang operasyon nga pagmina halin sang gindeklarar nga ligal sang Korte Suprema ang Mining Act sadtong Disyembre 2004.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 10
Mayo 21, 2006
www.philippinerevolution.org

Editorial

Maduguon nga pagpang-intriga, maduguon nga pagpangtapna

Malisyoso kag mapaniplang ang mandu ni Gloria Arroyo sa pulisya nga imbestigahan kuno ang sunud-sunod nga pagpangkuot kag pagpatay sa mga maki-masa nga personahe, lider kag myembro sang mga progresibong partido kag organisasyon.

Amo gani nga pakuno-kuno lamang ang amo nga imbestigasyon. Naobligar si Arroyo nga maghimo sang pakitang-tawo nga tikang sa atubang sang malaparan nga pagkunderar sa militar kag sa iya rehimen nga sila ang tunay nga utok sa likod sang wala untat nga kalakasan batuk sa pumuluyo kag ila mga progresibong pwersa.

Katuwang sang tikang nga "imbestigasyon", nagapalapta ang Malakanyang sang isa ka daku nga kabutigan: nga ang mga biktima sang kalakasan sang rehimeng Arroyo, amo mga biktima kuno sang "pagpurga" sa kubay sang PKP kag BHB, kag sila mga ginasuspetsahan kuno nga mga ahente sang gubyer-no. Kasunod sini, ginasiling nila nga si Arroyo kag "duha ka nagapamuno nga upisyal sang Malakanyang nga

ginahingalanan Gonzales" ang target nga patyon sang BHB. Wala pa nakuntento sa mga kabutigan nga ini, gindugang pa nila nga igasunod man sa mga pagapatyon ang pila ka lider sang pangpulpitika nga oposisyon.

Nagkadto na sa pagtahi-tahi sang pantasya ang Malakanyang sa desperasyon sini nga takpan ang kamatuoran kag manghugas-kamot sa responsibilidad sini sa pagpatay sa ginatus-gatos nga progresibong aktibista. Malisyoso nga ginapasibangud ini sa PKP kag BHB sa katuyuan nga magsabwag sang intriga kag samaron ang rebolusyonaryong kahublagan. Ginatinguha sini nga tungaan ang kubay sang nagahiliugyong prente nga anti-Arroyo kag



pahinaon ang kahublagang masa nga nagasulong sang pagpukan sang rehimeng Arroyo. Gusto man sini nga pahugon kag ikundisyon ang pumuluyo para sa mas masingki pa nga pagpamigos.

Kabahin sang maduguon nga pagpang-intriga sang rehimeng Arroyo ang pilit nga pagdalahig sa anum nga tiglawas sang mga progresibong partido sa Kongreso sa mga kaso sang pagpatay kag pagkuot.

Mga tampok sa isyu nga ini...

10 armas, naagaw sa Leyte kag Samar
PAHINA 7

Interbyu kay Jorge "Ka Oris" Madlos
PAHINA 8

Daniel Boone Schirmer, 91
PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*